

Li mouchon-bèni

On brun' mantia su s' palausse tchimîje po moussî sès yût grames. Et deûs-ouys dizo dès longus soûrcis po fé l'analyse di tèrin.

C'èst l'iviêr, à l' manéye¹, qu'i m'a l' pus sovint miné dins s' sicrète bole. On p'tit èyauve crèkion cit'la. Todi avou s' quèwe ridrèssîye. On rond nozé p'tit cwârps qui vole sins s' jamais rapaujî. Tofêr aler veûy dins lès flachis'. Po-z-è rèche foû t't-ossi rade. Fougner dins lès mossès èt lès mwatès fouyes. Tchampyî t't-autoû dès grossès pîres, dizo lès rècènes èt lès vîs stos staurés pa lès tayeûs aus-aubes. Et nin dandjî d' microscope, savoz, li ! Là wou ç' qu'i faut quate paîres d'ouys po veûy çu qu'è-st-è vike, i vos r'lopéye, sins s' brouyî, one banseléye di p'titès bièsses qui n'ont ni cu ni tièsse. Et à l'ocâsion, si fé one crausse eûréye d'one costri èdwârmûwe ou d'on nâwe viêr di bwès.

Ramèchner s'-t-amougnî sins laukî, qu'i fait. Riv'nu dîs côps su l' min.me sitokéye. Ranchî dins l' min.me bowéye qu'il î aveut d'dja v'nu l' minute di d'avant. Rinicheter au pus pârfond d'on fwès. Po s' rimostrer dîrèc là èwou ç' qu'on nè l' ratind nin.

Todi su dès télemints tchôdès breûjes qui sès musses brûlênut à fait tote l'amonucion qu'i satche foû do tèrau.

Qui n' l'a dj' riwaîtî, ci p'tit vayant mouchon là ! Qui nosse pa èt mi, nos fyin.n' toubac'. Et qu' li, i profiteut d'on r'toûrnadje qui tchèyeut à pont po n' nin manquer on tèrîbe pètchi d'aspanserîye.

I vos l' faleut veûy si foute one boure. Qui s' pwintu bètch ènn'èsteut fin craus, jusqu'à s' rècène.

Vinu au pus près d'lé nos, qu'i fieut afîye. Sovint, do tîmps qu' nos mougner.n' nos tayas. Achîds, qwèys, tot r'waîtant copèter lès coches di nosse feu. Et li, là, pad'avant nos, tchîpler saquants côps tot clinçant s' tièsse. Quétefîye po nos dîre merci, waî ? Pwis, r'foute si camp come one soris, djouer aus caliyates su s' tchamp d' bataye. Sins rovî d' nos-èvoyî on djwèyeûs cryaud... tit-tit-tit.

Et nosse pa èt mi, ni jamais sawè si c'èsteut on maule ou one fumèle. "A cause ?" mi dîroz. E bin, vos nè l' savoz nin ? Li bon Diè l's-a mètu è coleûr fin parèy tos lès deûs, don !

Pierre LAZARD

www.ecoledewallon.be

¹ Manéye = part de bois distribuée aux habitants par la commune